

Gabon-batzeiak



Grain dala urte batzuk, Gabon-batzeian ebitzen hainbat talde agertu geben argazki zaharren sailtxo honetan. Baiña aspaldixuan eztozu holakorik aukeratu. Gabon-giruan gagoenez, Bilbo aldetik heldu barri xakun fotografixa kurioso hau aprobetxaitia gura geuke aurten. Hau be ezta atzo goizekoa: berrogeta hamar urte pasa dako, 1948xan agustiñuen komentuko patixuan ataratakua da-eta.

Agiri diran mutiko eta mutikote gehixenak laterandarren kolejiixuan abadetarako ikasten ziharduten, kantore-taldia itxuraketako eta inddarketako dagozen musiko banakak izan ezik. Fotografixa zein garaitakua dan kartelak erakusten doskue garbi asko; bixak erderaz, jakiña, sasue haretan euskeraz idatzi ezker, denuntziaren bat jasoteko arrixku latza egoten zalako. Honeitxek ditzuzue taldekidiñen izenak ezkerretik eskumara:

Zutik: Joxe Luis **Erostarbe**, *Etxebarrialde*; Iñaxio **Lazkanoiturburu**, *Kale Zaharrekoa*; Alfonso **Beltran**, asto gainñan kape-liarekin daguen *mondraguetarra*; Patxi **Lasa**, *Aldabakua*; Jabier **Zulueta**, *Kale Zaharrekoa*, "Felices Pascuas" kartelarekin; Jexus **Guridi**, *Argiñena*; Iñaxio **Illaramendi**, *panaderixakua*; Felix **Ugarte**, *Gumersindoreña*; eta atzeratuago Joxe **Errasti**, *Auzabarri-Lezesarikua*, "Se permiten Aguinaldos" kartelari eusten.

Makurtuta: Joxe **Ortiz de Urbina**, *arabarra*; Manolo **Murua**, *Antuena*; Rafael **Zulueta**, *Heredia*; Joxe Luis **Anduaga**, *Xoke-ruena*; Joxe Mari **Gorostidi**, *Eperretxe*, turutiarekin; Iñaxio **Ibarrondo**, *Plazakua*, tanborrarekin; Tomas **Uribeetxebarria**, *Santa Marinakua*; Iñaxio **Olea**, *Ordiziakua*; Joxe Luis **Biain**, *Kanpantxokua*; Luis Mari **Isasmendi**, *azkoittiarra*; Iñaxio **Orobengoa**, *naparra*; Pako **Gómez**, *madrildarra*; Felix **Elorza**, *mondraguetarra*; Jabier **Elorza**, *araoztarra*; Iñaxio **Galdos**, *Murgialdai*; arpegixa ikusten etxakon bat; Joxe Antonio **Gimeno**, *naparra*; eta Felix **Kortabarria**, *Kale Zaharrekoa*, saxofoiarekin.

Atzekaldian somaiten diran belarri haundixak **belena** edo **jaiotzia** tiraketan eben astuarenak dira.

J. E.

Argazkixa Tomas Uribeetxebarriak bialdu dosku eta argibidiak Tomasenak berarenek eta Karlos Anduagarenak dira.

Oharra: Orain hurrenguan Kale Zaharreko gasoliñeria Oñatiko zaharrena ete zan bota geben. Joxe Mari Urzelairi esker badakigiu lehentxuago izan zala beste surtidore bat Lukaseneko kantoian, orain *Kutxa* daguen ertz horretan.



OÑATI

Hormigoiak, S.A.

Zubillaga auzoa, z/g (Olano) Tfnoa: 78 29 12
OÑATI

